



## Dr Doodedanz an dr Mäss

S'isch nyt loos in Basel duets heisse  
und doch dien so viil no Basel reise  
gits ebbe-n ebbis gratis oder gschänggt  
as dr Platz zem Parkiere niene aanelänggt  
uf Jeedefall han-i no nit erkennt  
wieso alles zer Mäss Basel hindre rennt

Also mues ich das go untersueche  
worum die Alli d'Mäss dien bsueche  
i stand ebbe zwai Stund aa und kumm denn iine  
und was i do gsee, verzie mer minni Miine  
duet me jetzte die Doode nimm begraabe  
stellt me si jetzte uff deheim oder imm-ne Laade

Goots ebbe non-em Trend: me wirft nyt ewägg  
odder isch das aifach e neye Gägg  
kam-en e soo uff em Heernli dusse ebbis spaare  
wenn dr Doodewaage nimme mues uuse faare  
das kääm im Büdschee vom Ueli Vischer seer entgege  
wenn me d'Liiche nimm miest under-e Boode leege

Und wytter ka me heere  
d'Regierig wurds yberhaupt nit steere  
und me dät sich au nit schiniere  
die Art vo Entsorgig z'propagiere  
im Gegedail die findets stark  
denn koschtets nämmlig nit emool e Sarg

I gsee ganz glungeni Gschalte  
doodi Kerper vo Junge und Alte  
numme Gnoche mit Seene  
mit und ooni Veene  
d'Gebei vomen-e frienrige Russ  
oder voner-e verläbte furchtbare Nuss

Es sig us rain wissenschaftlige Grind  
as me s'Lotty yybalsamiert mit iirem Frind  
si isch e ganz prächtig Exemblaar  
und dr Frind sogar e Superstar  
es duet sich loone as me si prepariert  
zer Schau stellt und Yydritt kassiert

I gsee die sonderbare Wäase  
due im Programm yber die Objäggt au lääse  
das mit em halbe Kopf und offenem Hirn  
oder das wo sitzt, ooni Stirn  
die Frau mit emen-e Fötus dinne  
was i gsee das lost mi afoo bsinne

E gschide Maa het no e Vorschlag ka  
wie d'Scheerholder no me Ertrag kenne ha  
me duet d'Firme Liiche, wo me nim het welle  
sofort däm Profässer yberstelle  
nadiirlich mues dä derfir Gäld aaneriibe  
as der Scheerholderwäliu sofort duet stiige

Isch nit schomool so Ain uf Basel ko  
e nerdliche Nochber und het is ebbis yberlo  
wo mer viil Gäld derfir hän miese zaale  
zem jetzte mit siner Fiirstett derfe z'praale  
uff jede Fall glicht dä Profässer sällem schambar guet  
mit sim graue alte filzige Huet

I stand vor dääne Doode und mues mer dängge  
isch das nit aifach – Liiche schände  
macht me jetzte au vor em Dood nim halt  
lost dä d'Mensche hytte au scho kalt  
und benützt sogar die Liiche  
as me ganz schnäll wird e Riiche

Pieteet, Aastand und e guet Gwisse  
vo dämm will me hytte nimm viil wisse  
s'sich wie me-s am Färnsee mues gsee  
scho länger und immer, immer mee  
das wird scho zem e neye Sport  
immer brutaler und meegligscht viil Mord

Glaubsch au Du das Usgschellte sig-i Kunscht  
denn stoosch bi Mängem in siner Gunscht  
de duesch-s unterstizze s'hyttige Strääbe  
wom-e nyt me gitt uff s Lääbe oder s'Stäärbe  
unterstizisch d'Meinig vom Profässer mit kalter Miine:  
dr Mensch isch nimm me wärt as e Maschiine

D Ladärneusstellig isch vom Mändig znacht, em  
13. Merze, bis am Mittwoch demorge, em 15. Merze,  
fir alli Bsuecher gratis offe uff em Minschterplatz.